



Activemirror:

E prome banda Arubiano cu ta interveni na NXNE30 Music Festival

ESCENA musical di Aruba ta haciendo historia ora **Activemirror** ta bira e prome banda Arubano cu ta actua na North by Northeast (NXNE), e renombrado festival di musica y arte na Toronto, Canada. E banda lo sali riba e escenario di e edicion di NXNE di e aña aki, representando Aruba riba un plataforma internacional hunto cu algun di e miho talentonan emergente den e industria.


NXNE tabata un pilar di e escena musical di Toronto for di mita di añanan 90, presentando artistanan nobo cu despues a bira famoso mundialmente. Actonan manera Lizzo, Daniel Caesar, Run the Jewels, The Lumineers, y Grimes un biaha a toca den e festival prome cu nan a bira nomber familiar. Awor Activemirror tin e oportunidad pa captura publico y añadi Aruba su escena musical n'e festival su historia rico.

E banda bou di e label Secret Agent Music Man a haci ola localmente, tocando den eventonan importante manera Aruba Art Fair y presentando nan propio show na Cas di Cultura.

Fuera di Aruba, nan musica a gana atencion internacionalmente, hasta a logra airplay riba stacionnan di radio na Brazil. Nan talento ya a ser reconoci na Canada, unda nan a embarca den un mini-tour, actuando na luganan manera Avant-Garde Bar, Café Dekcuf, y Queen Street Fare.

Cu e lansamento di nan album nobo, **'Though the Night Is Not Over'**, Activemirror tin un aña excitante dilanti. Nan programa pa 2025 ya ta yena cu presentacionnan, marcando un capitulo nobo den nan biahe musical.

Pa fanaticonan cu ta ansioso pa mira nan show prome cu nan bay Canada, e banda lo presenta awe 10'or di anochi na Alfie's in Aruba situa na [Dominicanessenstraat 10](#). E evento special aki, cu ayudo di AWEMainta, Arushots, y NPC Productions, tambe lo wordo transmiti live p'esnan cu no



por ta eynan personalmente.

Ademas, Jason Yarzagaray di Barbá Cu Dos Mic tin un entrevista cu Activemirror, caminda nan lo papia di nan ultimo album y nan biahe pa NXNE30. Si bo tin cualke pregunta p'e banda, sigura di sigui e link aki y manda nan aki.

<https://awemainta.info/barba-cu-dos-mic/>

Keda pendiente pa mas informacion ora Activemirror ta prepara pa presenta musica di musiconan di Aruba riba un stage internacional!